

參同契序

夫道大矣哉造化不能違也神聖不能測也天地賴之以生聖人不得而名不可以心思不可以言議不可以智知不可以識識以性會之猶隔天淵况以情求之者乎及乎道生一也一生而後道可得而神明矣一者有物混成先天地生是也大哉一乎天地之且造化之本萬物之祖也萬物莫不皆具此一而卒未能長存也關令尹子曰天地成理一物包焉物物皆包之是則一物一身各有一乾坤也且人之一身陰陽性命魂魄寤寐動靜生死之類皆二也各具之一果安在哉老子曰了得一萬事畢一者金丹也金丹者返本還元歸根復命之妙道也丹者

道藏輯要

參同契序

三

虛集四

會乾坤交坎離簇陰陽合男女使二者復變而爲一以至九宮八卦七政六位五行四象三才之生於二者莫不皆歸於一然後會之丹金者五行之極五行相生至金而極天一生水水生木木生火火生土土生金金最後生備五行之氣造化之功用全矣金之爲寶鎔之得水擊之得火其柔象木其色象土水火土木四性俱備歷萬年而不朽經百鍊而愈堅實剛健純陽之至寶也天得純陽故曰乾爲金一得純陽故曰金丹神得純陽故曰金仙其揆一也釋氏以地水火風四大假合修證金身得無量壽地水火風即土水火木四者不堅所以易壞惟一堅密身乃金剛不壞亦斯道也丹以金爲名者此也聖人知夫二可

以返一一可以返道故得九還七返八歸六居攢五簇四會三
合二之理廣而至於周天三百六十五度二十八宿七十二侯
十二分野八節四時凡造化之所有者無不會合此金丹之用
非天下至神至聖孰得而知之然天機雖秘代不乏人在夫一
念之精微可以感天動地若人善根純熟好道心切捨人間事
求出世因研究道真孜孜立學攷仙經窮聖典低心訪友下意
求師必遇至人授之口訣志道而不遇者有矣無志而遇者未
之有也真仙上聖多述經書開示後學惟東漢魏真人準易作
參同契二篇獨盡元秘述至道之血脈敘大丹之骨髓近世學
道之士罕見古文今得是書可謂丹經之祖矣其論至備而密
道藏輯要

參同契

四

虛集四

隱天機其旨至微而顯陳法象是經既作古今箋註者非一然
皆未明魏君之本旨所以張紫陽深疾後世迷徒恣其臆說將
先聖典教妄行箋註蓋嘆註是書之謬也嗟夫金丹大藥難遭
難遇非世間事是書所述至深至秘非世間法苟未遇至真未
達淵奧徒恃廣覽妄釋聖經豈不紊瀆高真迷誤後學而招禁
空之醜耶愚遭遇師真積有歲月每覽是書愛其敷敘詳備自
入室辨大事之後遊戲人間以訪人接友爲樂勘辨賢愚審察
邪正痛傷近世得道者稀悟真者少雖復顯露天機亦未易會
解二三道友問是而勸愚註之且曰是書之旨昧千載矣諸家
之註旣不足觀達道之人又不時見今君不註則魏君之道將

誰發明愚應之曰魏君不言乎熟讀千周萬遍神明自能告人
在學者精勤耳何待贅辭况愚騰騰兀兀懶散度時豈暇事筆
硯耶自是而後二三道友每相會談道之際輒舉一二段求釋
其旨 在錢塘八九年間口釋是書不覺將盡一日錄以示愚惟
欠數段求足成前文且請爲序愚因嘉之信手補註就序金丹
之所以云端平改元二月圓日抱一子陳顯微序

道藏輯要

參同契
序

五

虛集四